

陸豐縣志卷之十二

藝文志

邑乘之有藝文匪直以辭章重也。有邑之事與地宜  
人與物既志之矣。又藉文以傳之。文足以徵信於後  
雖布帛菽粟尺幅寸簡必取而錄焉。亦猶夫古太師  
陳詩以觀民風云爾。若夫摘葦揆藻而失其實于志  
乎曷取哉。志藝文

明朝編次先明朝後本朝者便於因文論世也。至文有  
各種詩有各體。今不便區分。止別文與詩為二類云  
文

陸豐縣志

卷十二

藝文

請勦山寇疏

隆慶六年八月

邑貢生

葉宗德

廣東等處地方承宣布政使司惠州府海豐縣歲貢

生員

臣葉宗德

臣朱治穆

臣姜夢星謹奏為僭逆劇

賊割據土宇。从肆劫掠。荼毒生靈。禍延三都。懇懇亟

賜征勦。扶助元氣。事切惟本縣所轄七都。吉康坊廓

獨當縣治東北二幅。地方延袤。約有一縣三分之一。

錢糧計有千餘石。自嘉靖三十八年間。有花腰蜂強

賊曠古僅見之慘。雖蒙征勦。所殲者千中一二。餘黨

悉招。因得肆志。依山為巢。胚胎亂本。覃蔓八九年間。



一哨發則招插一峒二哨發則招插二峒撫育年深  
遂有賊首馬祖昌李冲山號稱天總割據河田東坑  
大溪輦等處藍一清賴元爵號稱天總割據螺溪三  
溪上護新田南嶺南洞等處曾文瑞黃明時亦稱天  
總割據爛田廿坑葫蘆輦八萬洞陂溝洋口等處遂  
連營結擾民不聊生靡有孑遺僅存城邑危如累卵  
元氣日蹙殆猶斃羸之積疴待斃臣等草邑螻蟻民  
命固不足惜但逆賊互相策應毒延三郡由巢穴而  
出東南則抵于潮州府之惠來潮陽揭陽而攻圍屠

寨諸縣咸受其害由巢穴而出西北則抵于本府之  
歸善長樂廣府之東莞增城攻圍屠寨諸縣悉罹其  
殃殺人盈野流血成川圖里十有九爲坵墟人命十  
有九爲冤鬼二都離散之民僅存一二如臣等脫死  
求生傍城插處又陷追併錢糧空腹供輸艱苦萬狀  
東逃西竄恨無地以棲身冤無門以控愬每遇上官  
經過地方山賊焚廬灰猶未燼誰不目擊心傷徒負  
長歎而已屢赴撫按併各衙門仰訴雖蒙查勘征勦  
實的無何文官武將動以糧乏兵少爲辭臣等切思



此害不除勢必一至於陷邑城劫倉庫馴至堅冰月積而歲可待也草莽微忱籲天伸懇伏望皇上矜憫殘民大施惻隱勅下兵部嚴行都察院精選各將調發大兵前去遭難地方相機而討則逆賊雖鴛鴦而一鼓可擒元氣雖日蹙而一時可回生矣臣等不勝惶恐祈懇天恩之至

奏勦平寇序

萬歷四十四年

王一鏡

昔馬伏波聚米圖形而帝曰虜在目中遂平隗囂裴晉公經畧淮蔡曰誓不與賊共生卒俘元濟予因言

陸豐縣志

卷十二

藝文

三

戰而知二公之功也又因二公而盱衡我豐葉公疏請平賊益知言戰之功也豐邑西北枕山東南襟海虎踞鯨吸之妖不時出沒嘉靖年間海倭氛起山棲無賴之徒緣以竊發招亡納叛嘯藪號山各據重巖以爲保塹恣行屠掠下民失所生者喪其廬屋沒者不保塚塚沿山諸地盡爲賊佔所謂三十年不知有朝廷也黨夥盜名不可勝數猖獗一方繹騷三都當不克招不服豐邑僅保孤城危如累卵諸藩聞大使有袖手嘆莫何者耳葉公患之謀于姜朱之朋曰除



此害非藉天子之威不能而一隅徼地萬里長安誰  
爲念者會公計偕乃相與疏賊罪叩闕請討天子可  
之下其議于有司勅將徵發制府殷公調鄉土兵及  
官軍屬于憲司唐公叅戎沈公將與分守顧公監歸  
善永安二邑軍應之整師各征周公儀萬遣輦官雷  
亞保半行招撫防其聲援旋礪鋒刃以應師行蚤峙  
糗糧以資軍食五申誓衆三路進兵賊招呼以圖大  
舉諸崗未有應者賊勢已危退保許山赤竹輦獅子  
嶂葵頭嶂等山此山迺豐之巨嶂也高可插漢險絕

懸車賊自謂負固憑高仍懷螳臂孰意決策運籌地  
出天落先登陷陣石走沙飛跋險入深賊遂大潰或  
誅夷而伏尸斧鉞或生擒而執訊獲醜六旬露宿一  
朝掃平然後下令班師招集遺衆各還徃日侵地螺  
溪三溪新田上護河田大溪輦八苑洞等鄉始爲國  
家有也夫鳳詔一頒羽檄交馳數年哨集霧廓雲清  
天子功也錢穀神輸兵材山積劍峰電轉旗幟雲蒸  
此文武僚吏功也若問罪之詔未宣將帥不敢出有  
司不敢言向非抗疏力請寢歲不舉使逆賊坐大併



南粵東豐事尚可言乎非公一疏之功而誰功也豐  
人皆知戰功未知戰言者子獨功公益歎言戰者之  
已明且勇疏以成謀也彼言官疏事非殉命如入九  
軍非腹稿心齋數日未敢就一疏也臨疏而安排字  
句夙時欲言之意減其半矣踧踖趨進囁嚅登對併  
所欲言之意又減其半矣公以書生言事畧無惴心  
今讀其疏有先輩老成家法按其情形有天子不得  
不赫然怒剴然籌必勝非明於料敵勇於陳言如圖  
隴中畧河北之書者能乎昔人云一言賢於十萬師

公之謂矣公

諱

宗德

表

汝嘉

號

石泉起家歲進士其

子孫徃徃俱聲譽序說者謂公功之一報也公之姪  
孫變元發朝賢書與予嚶鳴誼篤出公疏以示予強  
予乎序故識之以俟報功者採之

石橋場新築土城記

黃

紳邑人

孔子作春秋城邢城楚郢之類莫不備書夫豈無謂  
哉傳者以爲重用民力余竊謂不然師曠有言天生  
民而立之君使司牧之言君道惟在于牧民也然牧  
之爲言猶曰遂共生云爾夫寇盜奸宄已見于唐虞



之際不有城郭以爲之衛則民之就戮者衆矣何以  
遂其生乎故春秋之築城必書與其得牧民之道也  
天下之民牧於天子一邑之民牧於縣令小大雖殊  
責任則一爾但世道日降吏治日敝爲之縣令者惟  
以簿書期會爲急其外患侵陵漠不加意邇者倭夷  
入寇所過殘滅諸縣令但能固守其城則自以爲功  
上之人亦從而褒之曰是固有功於民者郊垌之外  
死者枕藉則胡越相視莫有致詰者民何所賴以爲  
生乎海豐爲邑廣袤數百里皆遡海而居民間擅魚

鹽之利藉以溫飽石橋場設於碣石衛西門之外尤  
稱富饒自國初以來民不識兵歌舞相聞去邑治百  
四十里而遙固縣令所不加意之地也嘉靖壬子海  
寇勢熾標掠其地官寺民舍一時俱燼赴鬪而死與  
被執而俘者不可勝數幸而存者罔有固志轉徙相  
望者僅百餘戶爾癸丑復掠視昔尤烈所遺特鮮矣  
吉水南川張公適爲邑令言之輦蹙力請於海防憲  
司爲築磚城欲與碣石衛城並峙允而復罷公亦督  
餉嶺西無復與經營者丙辰又掠民不堪命公至嶺



西復輦蹙曰是何但已乎於是招徠旣徙之民使復  
故土量其家力之厚薄差次會歛助以贖罪之金爲  
築土城自是年十月徵工迄次年三月竣事民不告  
勞而崇墉已固東因衛城之垣其三面各延百餘尋  
基廣一尋有奇女墻偵梁俱甃以磚乃立三門如城  
門之製場之遺民至是始獲寧居寇復入境睥睨而  
去附近數十里內一門有警輒徙避其中歸然爲一  
方之保障非公之加意于民不死則徙耳烏能遂其  
生之若是乎縣令如公可謂得牧民之道者矣公爲

政是邑惟以休養生息爲事簿書期會有所不屑境  
內之民莫不蒙更生之惠而惠之在石橋場則猶其  
昭晰者也怙公之功莫可爲報乃建祠於場而尸祝  
之雖公之勲庸未艾不徒一方之廟食而是祠亦且  
爲之兆矣余不能文而覩記最悉故紀其實而鐫之  
以備傳循吏者採輯云

重建碣石署碑記

明

孫光祖

嶺東  
大叅

碣石故稱雄鎮負山阻海實惠潮二郡門戶又其地  
有魚鹽之利頗稱饒給宋末避兵者多居焉國初未



有專設洪武間都指揮花茂始建白開剡城隍營舍  
增設沿海碣石神電等二十四衛所因請調發揮使  
而下凡八十餘員旗軍五千六百名海運潮儲二萬  
七千有奇並在所屯餉給軍兵食饒贍振層巒而控  
渤海兼之形勝制置約法既定垂給昇平者百餘年  
迺後稍更初制梧戍踐更潮餉改折兵力始分武備  
寢衰矣嘉靖間海寇猖獗以守備梁希孔議募新會  
兵二百五十餘名分駕烏艚列戍湖東魚尾石橋諸  
港濱海稍寧無何撤去併其工餼添募遊兵爲全省

總巡而沿海諸灣無復備禦嗣之礦賊竊發山海交  
構兵連二十年外無聲援內無糗糈城潰凋殘諸營  
建盡付烈焰故址荒落武胄子子十無二三可憫也  
已督撫殷公平定惠陽以叅將侯君繼高脩嶺東仍  
駐碣石君至覩荆莽蕭條蹙然有慨於心曰是余之  
責也夫乃謀之父老及諸將領意欲有所捐而未克  
濟適副使夏公叅議李公以守巡先後鎮臨脩嘗其  
事長慮却顧思爲嶺海之基迺首發名錢七百緡貯  
衛而以經畫屬之君君得之喜曰是成事之會也乃



採閩材浮海而來卽山而石卽土而鎮卽兵而力則以子山午向中爲正堂左右爲經歷鎮撫南以樹垣左以祠大纛又左爲圃以射署爲後因基累石爲臺而亭之登高可眺山海之勝垣南以塘西以鄉約所城之北營建元武山寺宇以崇其後凡四閱月而竣衛所事如床第几席髹漆器什靡不纖悉具視初制斌斌乎宏麗矣君雖以武發家恂恂有儒者氣象其治軍毫無犯起家二十年蕭然寒士至其當事任勞勤苦不避亦其天性然也且聰慧善計算揣摩諸營

作皆極工緻居五年先治城廨於山中之新田後治叅府於惠治所於甲子治廨於石橋場治驛於東海濬皆以兵力之餘爲之其善用所長類如此嗟乎後之人思夏李二公之謨念君之勞績張皇戮力爲瀚海長城庶幾無負斯舉矣予兩按歷惠陽清操備畧每雅重君故爲之論著以俟來者當不令其泯泯也君諱繼高字繩武金山衛世襲指揮同知今爲南澳副總兵萬曆五年仲春吉日軍政掌印惠州衛指揮閻常等立



新建碣石元武山記

葉春及

高皇帝以馬上得天下軍府雄於百司承平右文儒者用吏介胄之夫頰首仰給自子所見軍府十不九完烏望穀甲礪戈禦寇也入其室崇禳不治則家政可知矣碣石爲衛控制大海巨島夷置兩蹕于兵大將軍侯公叅將惠州發憤新之語在孫大夫記中而以其羨治元武山負麒麟石西連三台當碣石城北元武北方之神故有事焉中爲堂禺象左右翼室居僧前爲門後亭之曰福星西下爲石池上有岫曰起

龍又亭之曰一鑑可觀滄海可望烽燧可與叅佐樽俎之而折衝士可投石超距也侯公慮無以共僧先是城西桂林有永興寺廢遺田若干覈之於是指揮張元卿歸三台石田歲租四石編民莫迥歸烏坭坑田塘一頃二十一畝歲租八十四石二十倍之莫速歸田塘一十畝歲租二十石四倍於張元卿卒伍康廷科路頭園田歲租二石減元卿之半歲入共一百一十石書於海豐之版而歸丌食於僧叅將季公纂其緒分長離山人求記石洞子曰元武北方之宿其



象龜鼉有甲能禦侮故兵家殿之然余聞之行間彷彿元帝金支翠旗自天而降則士氣百倍所鄉必捷神道設教兵之上計也二公皆善用兵者有旨哉侯公名繼高號龍泉世直隸金山衛指揮同知季公名金號龍岡世浙江松門衛指揮使中戊辰武科進士第四人

法留塘石亭碑記

海豐周一敬

余自己巳春承乏蒞茲土夙夜冰兢祇求保安斯民乃山海竊發凶旱駢臻心謂一二達者分猷念以相

補或其過私糴以絕盜糧或其捐餘貲以蘇民困雖爲之執鞭所忻慕焉頃以報敬入覲道經法留一方耆老呈爲獎舉孝廉林呈祥禁穀濟飢立石頌言事爲之忻然曰夫與叔孝廉者守恬修潔公餘不得覲面厭塵樂志道外別有會心意其人必有不可一世足高千古者允若茲呈是予望中人意中事也士夫之聚好惡得正猶心折焉况翩翩孝廉之俊立德立義者耶爲之言曰滔滔斯世以利爲利矧都權藉疇諱染指羨君懋德早雋濟美憫世荒亂軫人猶已聞



穀出港賊揜外徙指困賑饑惠洽閭里勉勸族戚行善普濟德惠可師風教有裨喻爾有衆登石勒紀

勸學家訓

舉人盧功名  
知縣

猛虎畏蜂螫神龍避螻蟻非實畏避之也棄置之也馬之遇渥注而奔騰遇蹇驢而躑躅者良驥馬也鷹之見鵪雛而搏擊見腐鼠而遠去者良鷹隼也丈夫處世無論構難扞忿不可與鼠輩爭氣卽學問文章不可與庸流競長警之操錐則當逐李杜持兵則當戰韓白兒攜賁育汗流慶忌折石窮之弓扛洛邑之

鼎方爲不磨文章不俗男子若索腸而思馳俗士是何異於與黔婁鬪寶與無唇辨言與王兀爭走與矇聵競明與焦僥侏儒比長量力也

盧伯鍊壽序

大宗伯黃奇遇

伯鍊盧年翁治毛氏詩領袖士林笙簧藝苑以故鳳逸龍蟠之士越境而結交知扼腕間談及文章事業無不志在千里當其爲弟子員矯矯逸氣才乃大常日月省試諸有司咸審音而嘆賞焉未幾董公曰邈來督粵東學奇其文遂稱旣廩未幾董公曰邈



公曰棗來汎碣石乍覲許之爲驂駟再見題之爲琬  
琰其沿海計安便宜皆欲決於盧生之策不然萑苻  
賊艘揚帆去來疇建白以疏其治狀乎香寇發難石  
橋西北隅雉堞圯毀岌岌難支翁則募鄉勇寢處其  
間獨當一面東門外列屋而環居者懸疣附贅每爲  
心海公則出百鎰以償之仍其地築砲臺以扼盜衝  
郡司馬晉安余公豫章黃公欽厥才學交口推揚進  
而器之子在燕都聞之竊喜著國士名冀其歌鹿鳴  
而來也乃數奇未第值大策歲進士翁以明經廷試

授京秩至兵部主政旋以薦疏治南安監軍道予亦  
晉秩大司馬薦書歲下卒用遷去翁亦白丞相去歸  
其鄉以文章訓後進誠子孫以疏廣受二子爲法予  
艤舟錦江每嘆山靈海若不肯訶護才人及造其廬  
流覽於名宦鄉賢之遺蹟未始不厚其儲也乃與翁  
登高而遠眺見乎山之踴躍而出也翁曰是地大塘  
古樹數株吾先人所手植也某水某邱吾先人所釣  
遊也意欲卜築杖履逍遙其間先生以爲何如予深  
許之居無何予以僕從東上翁遂爲畫錦之堂於此



山之陽今年秋石橋親友謂天泉長至日翁攬揆初  
度具列其狀乞言於予予曰翁之孝友嘖嘖人口無  
庸稱述其文章事業予將以牖戶綢繆者祝以邦家  
之基乎曰然將以羽儀王國者祝以邦家之光乎曰  
然將以林下懸車祝以德音不已乎曰然然予更有  
進焉六一居士依然黑者未星星則山阿之日月偏  
長非德音是茂之徵乎綺筵坐花常棣色笑舞袖稱  
觴德星有耀非保艾爾後之徵乎予縻絆於茲弗獲  
躬親躋堂願諸君子爲予進一卮而祝之可乎是爲

陸豐縣志

卷十二

藝文

十四

序

登瀛石銘

前人

天留一石以作天家君臣遺影苔蝕如霞蕪蕪之飢  
化作瓊沙銜珠青鳥以瘞重華

國朝

奏開界疏

黃易

己亥科通政司觀政進士黃黃易奏爲遵

諭瀝陳遷民額 恩亟復邊海以廣

皇仁以答天和事 惟聖王御宇萬民樂業則上天降之



百祥雖間有災厲如堯水湯旱然天下得所終可化  
災爲祥邇者星變地震示異交倣我

皇上引躬修省下求言之

旨頒肆赦之

詔軫念民生至詳且切矣臣粵東一介何敢冒陳末議以

瀆

天聽但竊思自念君上有善而不宣播生民有苦而不入  
陳是豈臣子之心伏讀

上諭山東青登萊等處沿海居民向賴捕魚爲生因海禁

陸豐縣志

卷十二

藝文

五

多有失業應照該撫所請令其捕魚以資民生大哉  
王言誠古聖王如天好生大德矣乃江浙閩粵向因遷海  
民苦流亡竟無有以是入告于

皇上者俾美意出自

宸衷而未遍之窮陬良德施于近地而未廣之邊隅臣是  
以不敢不爲

皇上陳之夫舉一隅可以觀天下卽以山東青登萊之情  
事較之各省其勢不遠如臣居處粵東近海等府幅  
員二千餘里其中民戶不下幾百餘萬自遷海以來



百姓室廬蕩廢露處于荒郊生業淪亡號泣于道路  
至父母兄弟不能招存賣妻鬻子苟活旦夕甚且有  
離徙他鄉求生無計全家仰藥而死者其呼籲無告  
之情誠難一一殫述矣然此特就臣粵東所見言之  
耳卽以粵東之今日推之江浙閩省諸如海邊等處  
遷海之民其困苦死亡臣雖未嘗經見然其流離傷  
慘之狀當亦必有同者則捐

國家數千里之疆域而棄爲荒徼委

朝廷數千里之生靈而聽其流亡誠未見其可也况有不

陸豐縣志

卷十二

藝文

六

盡此者粵東鹽田悉屬邊海遷之則無鹽可種課餉  
何出民食何遂又其甚者奸宄詭藉海禁窺內地居  
民或有升斗之鹽指爲踰禁出海多方索騙勢不傾  
家不止嗟此小民何罪何辜而使其展轉困踣一至  
此乎今山東近海等處旣荷

皇上軫念許其出海捕魚得復生業而江浙閩粵諸省未  
蒙一體推

恩此不能無仰望於今日者且粵東自去歲年穀不登米  
糧騰貴遷移之民旣失本業復遭歲歉勢不胥于死



亡不已臣愚以為及今亟布

天恩諸如邊海諸省遷民悉令復還本業俾得採捕耕種  
猶可拯救萬萬所以格昊蒼而名祥和端不外是臣  
草茅書生罔識忌諱但仰遵

皇上求言恤民至意從地方百姓起見冒昧直陳字多逾  
格如果臣言不謬伏乞

睿鑒採擇施行

元帝救民序

鄉賓 庠生 邑人林大遇因之

國家定鼎之初海邊未靖遇於舊墟迎仙糧地築居寨以

陸豐縣志

卷十一

藝文

七

保族黨甲午仲春海寇蘇利據碣石統眾萬餘圍困

居寨遇率眾拒守數月薪水俱絕幸賴 神靈附人

固內強外寇乃解圍族黨以安後因居寨作營遇避

居鄉曲乃為序刻板以誌 神功曰維天司清維地

職寧維 帝協德屏民之生常冥錫福變顯神擎歲

在甲午蘇逆縱橫島合萬眾重困孤城砲聲如雷永

月轟轟垣城圯毀屋宇頽頹堆木外逼竭泉內驚

帝即顯聖掘水新井倏蹶 帝肩突登城頂隨敵所

至靡不克勝堅守數月智勇倍增臨城破敵厥角若



筋寇乃膽寒解圍息爭闔境無恙復見泰寧今雖播  
遷尚蒙餘慶大哉 帝德民曷能名謳思無已聊獻  
輿情

元帝廟碑文

失名

史稱符堅寇晉臨水而望八公山草木皆兵堅卒以  
敗又傳劉鋹拒命王師往征鋹見一金甲神人揭幟  
先登鋹亦隨以殄予嘗閱此未始不嘆史氏之浮誇  
而俗傳之誣襲也蓋天道之助順誅逆彼背逆者自  
生疑懼其曷嘗有此哉乃予來駐甲之間有六年甲

陸豐縣志

卷十二

藝文

六

寅四月際四方騷動我兵遠調西粵草昧竊發於時  
城內兵民寥寥而遠近村落莠民欲圖揭竿響應爰  
岌乎土崩之勢然北廓之外有一元帝祠在焉是夜  
寇來予臥敵樓中若有趨予起者忽寤而視賊果臨  
城下矣麾戈指士擊砲數聲覺殘星無耀東方欲白  
隨令步騎出擊如拉朽摧枯遂擒羅草薙數十徒厥  
後鞠囚始知已自三更抵此矣望見北廓一帶隱隱  
炬明疑其有伏故逡巡而不敢進於戲天道靡常山  
川社稷之神亦從而愛護之安可謂無其事耶予先



任水師提標左營於己酉年改調斯土初復邊汛  
薪披棘七載於茲矣捐資倡力造營房築城堡修樓  
櫓以備征防捐銃砲以充守禦立烽設渡練兵撫民  
力既疲於草創俸又糜於木石故於關帝廟觀音堂  
天后城隍各祠彙次蓋造塑像供燈而已未能完建  
鼎新也今元帝又能顯其威赫以全此元元之命守  
官之職卽欲舍此不報德其又能已耶因是再樂捐  
俸倡率聚士庶兵民之力以完造祠宇并勒碑記其  
事俾後世知天地鬼神之所以助順而草野奸雄之

不可妄肆猖狂僭竊之心也

碣石鎮城署告成碑記

楊宗岳

王者建邦設險有一隅而關天下之全勢一時而統  
後禩之全規者久與大兼之矣三代之世文告誕敷  
越楚析鑰未及交南乃一曰至於南海又曰海外有  
截蓋以示肇服之初俾薄海內外又安咸若焉斯盛  
也勝國以前備在西北 昭代之隆備在東南時與  
事殊耳往割濱海邊徼衽吾內赤識者不無輕棄要  
害反資觀望如鯁鯁然如唐廣德間不城原州之慮今



幸復舊園一置斤埃矣粵惠碣石衛明洪武二十七年  
因倭亂指揮花茂奏立歲以屯弁守之今

聖人當宇益闡宏謨沿海巖疆皆建牙置帥督闡苗吐華  
鎮公由粵副拔元戎奉璽以鎮茲邦而全惠廣潮儻  
汎咸隸焉誠重區也公世儒業爲弟子員慨然慕定  
遠終生所爲棄繻請纓著績燕雲晉朔間遂擢卓異  
而節鉞鎮之甫至則周覽扼塞躬履農畝時陣無半  
堞居餘敗砌茅棘沙霾所叢翳獸嗥鳥藪所羣處公  
喟然曰斯何地也鯨鼉出沒於斯風濤飄忽於斯先

陸豐縣志

卷十二

藝文

三

勞之謂何而乃以緩嘗耶身先裨將不蓋不乘與礮  
鼓相晨夕衛於是城然後布營汎造墩堡均里郵  
買民易衛於是有所寨有關隘有里戶又然後建衙  
署爲門爲堦爲廡爲堂爲將廳爲武亭爲器局衛於  
是有衙署更旁爲賓館爲文室時而閱武庫之藏下  
幕府之榻則又將軍能文之餘事矣是役也以俸橐  
勦公帑以率作寓勞來閤兩月告竣煥然一巨鎮焉  
蓋匪棘其欲祇適求我寧耳余於是慶朝宁之善推  
闡也昔京口戒嚴師武臣前後用命費金錢百億乃



平之今未雨之綢雖列亭障盛樓船達遠島不爲勞也海甸安則內圉固於以保萬年之佐助肇久大之光業猗歟盛矣旣紀其成爲之頌曰屹爾金湯外國是疆星布碁列閩越相望公旣受命弗敢怠違爾掇爾度子來踰踰匪疾匪棘懷安斯壤鐵兇鷹奮水犀龍驤公勤耀德乃詰戎行憬彼瀚島來享來王帝錫公社績賁於常公拜稽首載賡載颺聖人在上海波不揚

崇祀錄序

狀元大 崑山 學士 徐元文

陸豐縣志

卷十二

藝文

三

贈福建按察司僉事知歸化縣海豐黃君祀於名宦鄉賢二祠也其子繼隆以歸化海豐大夫士庶請祀於當事狀檄判牒都爲一編屬序於予予未及爲而客有見其書者曰黃君聞關閩廣寇賊之中萬死一生以全其節

天子所以寵嘉其忠者如禮制而春秋俎豆載在祀典黃君旣已不朽矣一時輿誦公移非有意于立言之工可以爲觀於遠與後如是雖勿存可也予曰不然自古忠臣義士瑰璋傑特之行必藉于史以彰而史之



作以有徵而信徵必自所見始柳宗元致段太尉逸事於韓愈也曰太史遷言荆軻徵夏無且言大將軍徵蘇建而太尉逸事得之於故老卒吏州刺史韓愈張中丞傳後序巡遠事得之雙廟之老人與故吏于嵩蓋傳聞者徵之於所聞者也所聞者徵之於所見者也史之作多得之於傳聞苟所見而無述焉則所聞者無所取信矣所傳聞者又奚賴焉稗官野史記前世事往往失其實者無所見者爲之徵也是編之存與夫稗官野史異矣夫以歸化海豐之大夫士庶

與其當事之於君猶之故老卒吏州刺史之於太尉雙廟老人故吏于嵩之於張許二公也則予之才雖不逮古人而旣已徵之所見矣雖欲無述焉其能已乎以是編爲所見者之辭而予徵焉則所傳聞者其不於是焉而取信矣乎予旣不能如韓柳之特爲太尉張許敘其逸事而因是編以表其信而可徵以俟諸傳聞者不亦可乎况君之居其鄉行已之槩與宰邑之治狀亦於是焉而可考其大畧也則又奚擇於其言之工與否也君諱易子同榜進士



砲臺序

兩廣楊 琳 滿洲  
總督 人

皇上神聖威武蕩平四海五十餘年猶安愈求安籌及海

防 勅下九卿會議丙申冬琳入覲謝

恩而承

諮詢并

命與廷臣集議其禁止南洋販載米糧私賣船隻諸條業

已奉

旨頒行遵照惟沿海砲臺議令督撫提鎮會勘具題 琳 陛

辭就道於孟夏初旬抵任越八日即起程順途先往香山

陸豐縣志

卷十二

藝文

三

澳門閱看次至省城會同將軍撫提諸公商議粵省

海道綿長旂繞往回非終歲不能竣事惟虎門為全

省門戶應行會勘餘當分任爰於五月朔日登舟偕

往勘明拜疏分道而行 琳 由東路馳往惠潮濱海諸

邑 琳 向為閩省提軍今觀粵中沿海郵落戶足人稠

商船絡繹俗鮮廉恥不畏盜賊之罪名而以盜賊期

富貴與閩中沿海惡俗無異焉雖營制羅佈而出沒

如常且其奸宄百出將欲上盜而預報被擄親朋贈

餞曾不為恥加之水陸營汛既得漁船陋規則稽察



懈弛以致奸徒通賊接濟盜糧實乃營汛縱賊殃及商民何以設防扼要申嚴紀律仰副

宸衷披雨冒暑徧歷島嶼因知歸善縣屬之大星山海豐縣屬之遮浪澳淺澳東西甘澳牛脚川石獅頭惠來縣屬之神泉港澳脚溪東靖海所石碑澳赤澳潮陽縣屬之錢澳廣澳蓮澳悉係一望渺茫並無山島遮隔然賊船不能久停外洋勢必駛近內海劫掠商船灣泊取水又新安縣屬之沱潭山潮陽縣屬之河渡放鷄山澄海縣屬之沙汕頭大萊蕪饒平縣屬之南

陸豐縣志

卷十二

藝文

十四

澳鎮臘嶼山長山尾鷄母澳環列海中悉屬內洋係賊船來往必經之路如各扼險把守豈能飛越舊時明季遺留及

本朝遷界後所築烟墩瞭臺周圍數丈不能駐兵雖有城堡數處亦在內港非控扼險要

琳仰遵

皇上指授於臨海山梁據三面之險相度形勢建立城堡自八十丈以下二三十丈不等安兵自八十名以下至三四十名不等城內俱築實心高臺不用堦口高出城墻堦口之上眼界瞭亮運用砲位三面應手上



設大砲數位建造營房官兵防守復添馬步塘汛以爲接應又達濠一營向設水師守備並無城廓捍蔽今築城一座以資守禦西自新安縣屬之沱潭起東至閩省水陸交界止共設砲臺二十五處城一座分駐官兵一千四百五十餘員名果能將備稽查弁兵効力晝夜瞭探以高臨下遇有賊船開砲攻打立成糞粉一臺之設勝於兵船數十一堡之兵可當勁卒千餘尚何奸徒不望風生畏敢於海面遊奕哉蓋服皇上聖算指示明見萬里無遺也但恐日久生玩弁兵潛

回數人看守虛應故事賊船去來全無知覺砲位鏽爛急時難用空負此舉所關甚巨是當

題明責成提鎮不時稽查無使懶惰督撫每年於正九兩月南風北風漸起二時捐備火藥砲子委員演放兩次

題報觸目警心庶可久遠至於惠潮二府沿海居民以漁爲業乃文武兵役人人得而魚肉之販米出海歷經嚴禁而守口弁兵藉此以作利藪此又多盜之歷年銅弊今以嚴示禁絕務在肅清



獲<sup>堪</sup>廉幹弁員來往稽察此弊或熄窮民既免需索  
洋盜無人接濟加以砲臺之防範則奸宄消弭俗易  
風移惠潮之洋盜絕而全省之海面寧<sup>琳</sup>故於查勘  
砲臺之際順途編點澳甲查革陋規飭諭將吏化導  
漁民以期風清弊絕共享

太平盛治今事竣返轡臚列險要各地商之同事諸公  
併附述其槩云

豐裕倉碑記

鹽運使馮元方<sup>山西</sup>進士

皇上御極以來敬天勤民感集和豐率土共稱安飽矣而

陸豐縣志

卷十二

藝文

三

猶

念芸生以食爲天蠲賑之外未雨綢繆

詔令天下郡縣設立常平社倉飭有司謹出納嚴盤查核  
虛實陳陳相因有備無患攷諸往古爲民積貯孰有  
如今日之周且重乎由是臣民觀感義助樂輸在在  
有之而濱海產鹽之地藉晒煮以供行運者實繁有  
徒此等丁戶貧乏居多故長盧兩淮間亦有積貯茲  
於淡水石橋二場建倉買穀同是意也按粵東雍正  
四年秋雨水過多收成稍薄而廣州肇慶二府兵民



輻輳戶口殷繁一時米貴除減價平糶外前督撫籌量發賑隨據在官鹽商趙廷佐等情願捐銀二萬兩備買穀石止用過一萬兩尚餘其半爾時藩司饒使僉議以此項出自商人仍於鹽上計議查得淡水石橋二場產鹽最多竈丁叢集且僻處邊海穀米稀少請將各商捐賑餘銀一萬兩以鹽之餘濟穀之乏一準時價採買穀石建立倉廩分貯淡水石橋二場以備偶逢荒歉并青黃不接需穀孔亟之時核數借給竈丁陸續在於支發竈價內扣回秋成買補一應出

入責令該場大使專管運司稽查年底取具場大使實貯印結運司核明加結轉移藩司彙核送

內部其該大使交代照州縣倉穀例造具冊結接管如買穀價值或有贏餘儘數添買均貯再或酌量爲建設倉廩之用經督撫兩院於雍正七年二月十三日具

題七月初四日接

內部咨覆奉

旨依議欽遵行回司道卽建淡水場倉於平海平山兩處



石橋之倉建在碣石衛城鳩工范材漸次告竣元方  
因詳請額名勒石夫貯穀以備不虞窮丁不啻屢豐  
而既飽勤於晒煮商人行運亦裕如矣名曰豐裕義  
取諸此第是舉也已歷數年穀本出於衆商創議則  
藩司王公名士俊齋使黃公名文煒也入告於  
君則大司馬孔公會同少司農傅公也俾此兩場竈戶永  
沐

聖世綿綿之德養而予適當其時得樂觀厥成爰原其始  
而爲之記以表衆善之攸歸云

陸豐縣志

卷十二

藝文

三

陸豐縣志序

河源 裘曰菊 江西舉人

海豐隸于惠州爲郡屬極東地縣凡七都西與賢楊  
安金錫石塘東吉康石帆坊廓環惠來揭陽長樂永  
安歸善以爲界北枕崇山距縣幾二百里南面風飛  
水立處卽之至邇亦不下六十里西則倍之而羸東  
則三之而絀號爲巖邑有由然矣藩憲王 披輿圖  
按版籍念此邑畛域寥濶凡徵發期會動淹旬日谿  
深嶂阻奸宄易生幸覺逮捕往往後期民間雖有疾  
苦長吏耳目不周以加軫恤其道無由月朔讀法遠



莫能至無以宣德化警顛蒙輸將考核累纒跋涉  
于山谷間行路之難卽在桑梓其它猶未易更僕數  
也因地制宜分縣以治則各從所近上與下實兩便  
之請于 督兩院檄日菊 從巡憲劉 擇其地之可  
爲縣治者爰自淡水循海而東至甲子所舍舟而徒  
歷東北諸境周覽相度議以東海滸爲縣治割吉康  
石帆坊廓三都隸焉旣報可復因我

皇上詔脩大一統志各直省皆編輯志乘于是更命纂修  
新稿以襄

陸豐縣志 卷十二 藝文 三

盛典自顧何人乃克勝此重任哉竊惟周禮大司徒之  
職以土圭之法求地中天地所合四時所交陰陽風  
雨所和會乃以建王畿其次樹侯封分采邑亦必辨  
其廣輪之數制其地域而封溝之務使疆界正道里  
均然後設險以守國度地以居民形便勢利臂指相  
應上無廢事而民亦無不服教而畏神是久安長治  
之所由來也海豐之地當古者百里之國五縣治與  
賢都邑西南隅也于東北方幾若甌脫析置新縣魯  
衛之邦分之猶大于陳蔡東海滸雖去北稍遠以視



舊治大相逕庭海豐息東畧之肩新縣無西顧之患  
異時控御拊循之所不及者自今以始皆歸戶牖履  
南三百年來創立州邑凡二十有二共切中時事裨  
益民社傳諸史冊者劉忠宣之設從化王文武之置  
和平至今賴之 藩憲之為是舉也繼二公之後鼎  
峙而三矣負弩下吏謬承任使勘地之役雖陳未議  
不足以當採擇至于網羅邑事勒成一書古今所謂  
三長會無一焉勉竭駑力偕友人南昌劉健据舊本  
叅以聞見以因為叛共計十有四焉既卒業敬序置

陸豐縣志

卷十二

藝文

三

縣緣起以備省志之節取以復

上憲之命云爾

擬新建陸豐縣碑記

教諭

黃繼度

貢生  
邑人

陸豐距陀城七百里自陸賈入粵建置郡縣從大嶺  
以東分羅浮一水為循州海豐又循州之遵海而東  
者也考海豐初建在東晉咸和六年至唐武德五年  
析置安陸卽今之大安屯隨置隨革復歸入海豐數  
百年來山川風土古蹟名物媲美中區雍正八年海  
令葉公以七都遼濶統轄難周詳請以海東居中之



地分設縣治雖偏隅僻處然負山煮海牟盆之利流  
給粵西近控潮閩遠走大江蘇水繒布菽粟以至珠  
璣綺縞四方之異物輻輳又其地衝而饒魚鹽富估  
所交會且文章經濟忠孝節烈以及高人逸士卓有  
可稱雍正辛亥年冬選員黃侯莅任以坊廓石帆吉  
康三都歸附版圖錫名曰陸豐僦工庀材先堂次庫  
次吏舍次私署宮闕巍峩而壯麗尊經有閣明倫有  
堂名宦居左鄉賢在右武廟城隍峙于東捕廳官舍  
城守汛防忠孝祠宇山川社稷諸壇莫不畢舉岷獻

陸豐縣志

卷十二

藝文

三

其力工無匿功翬如翼如經始於壬子之歲越兩載  
而告成數年之內人文蔚起戶口繁增山川葱鬱土  
野沃饒冠裳弦誦之雅財穀芻幹之盛視昔日之隸  
舊縣者且月異而歲不同矣今

聖天子神明天縱洩斯土者悉屬賢良浙水陳侯登賢書  
而宰陸邑甫下車卽以邑志是務又以新建陸豐縣  
碑記命題分試易曰風行地上先王以省方觀民訖  
敎陳侯有焉爰以壯臨蒞示威重於是乎在  
代貞珉刻之令猷以垂來禩是爲記



陸豐文昌閣碑記

河源 陳張翼

自雍正九年析海豐之三都作新邑卽東海滘之冢落以築城去古陸安故壤三十里去海豐縣七十里乃撮舉陸豐以名之謂不忘其舊也乾隆二年丁巳秋余來攝篆陟巘降原心領神會則見夫南距天池北枕嶺岫東山環峙西市羣萃又見夫水流赴壑始分於嶺嶺名河頭今改河圖殆以顛頂方員象形以爲表歟其右水向海豐出大德港入海其左水繞陸豐九曲出烏墩口入海烏墩納潮汐環城減竊以爲

陸豐縣志

卷十二

藝文

三

地之靈者於是乎在數十里靡靡每每千萬家林林總總蓋山麓之平原海濱之沃野也余因集紳士歷海滘登東山謂夫迎仙石梁鎖鑰密矣第右動左靜左宜建橋而東山屹立于巽宜建文昌閣卽書院別館嘉樹美木得附焉僉曰唯唯越明年余及瓜代去竊嘆余未竟之緒有如此也嗣是余歷官長寧平遠德慶以迄河源六七年間聞紳士不忘始謀工已克竣惟東門橋成而復北迨甲子秋余奉檄兼攝海豐事臘月之望因公復得至陸時北平王諱之正明府



宰是邑下車甫數月百廢俱興且欲創作邑乘囑余  
作文閣碑記以附藝文不敢謝不敏爰集紳士登東  
山升文閣訪書院乃喜紳士多好義能成吾未竟之  
緒已如此東山舊名鷄籠今改金龍其相期於人文  
者義必有在遂顏其額題其柱以誌其盛用以答王  
公振興之意而猶以修復東門橋爲諄諄也是日也  
紳士又作而言曰自建文閣以來科第蟬聯又有大  
安盧生海濬王生者年未舞勺采芹稱早慧而文風  
益振至海濬人烟輻輳迄今近悅遠來民大和會園

麓間瓦縫參差庶而加庶余聞之益喜士習丕變民  
生日遂有明驗也或曰形家郭朴之書會楊廖賴之  
說小道恐泥君子勿取顧禹貢周禮方中公劉諸詩  
已言及之雖小亦道也矧休徵之彰明較著者乎然  
則地靈之相感也固莫之爲而爲也人事之相應也  
君子之大有爲也生於斯長於斯者見義必爲卽食  
祿於斯者得爲而爲之或未得爲而尤樂夫人之能  
爲者之爲之也書曰不作無益害有益功乃成易曰  
有功則可火夫苟今知陸豐之山川鼎秀士民恬熙



日起而大有功且

文昌祠碑文

陸豐 王猶龍 山東 令

分海豐之半而作邑其土地人民依然舊也而城郭官衙

學宮壇壝倉廩之屬凡舉邑之所應有者實皆草創之既數年歷五令而規模粗備予承乏其後以海濱風雨之不時舊制率多頽廢因以催耕課糶之餘次第葺其破壞增義學以教邑子弟之俊秀者而未暇有所他及庚申春奉例釋菜於

陸豐縣志

卷十二

藝文

三

先師既竣事諸生合辭言曰自分邑來賴諸父師之教誠土地辟田野治而弦誦之聲無間於山巔水涘今又加設義學百廢俱興歲試諸童幾三千人焉而邑無文昌宮羣心缺然今栢城東南隅之金龍山厥土燥剛厥位面陽擬釀金而成之為邑人矜式輿論既孚敢以為請予曰此善舉也宜急為之於是人情翕然聚羣材陶瓦甃工善師良莫不心兢設四楹以奠神立門庭而式配繚墻既周階城如法庭軒修敞丹堊聿鮮凡歷數月而厥工告成爰修祀事燕飲以落之



揖諸生而告之曰傳言神爲詩小雅之孝友張仲也  
其事不可考其理有可信今國家

聖聖相承文教敷於四海凡所以教育士子者亦旣禮無  
不至恩無不逮矣以故士皆知淬勵於學願以修齊  
之功佐治平之業今諸生旣誦法孔子習仁義禮樂  
之說而又創以上祀

帝君是必能做其孝友資於事父卽資於事君他日入  
佐

朝廷出加民上必克自樹立使地以人重增新邑之光此

陸豐縣志

卷十二

藝文

三

國家立學之心卽諸生創祠之意也若以  
祀之者爲有福是私欲已侈得罪於  
其念之皆應曰生謹奉教爰誌其言於石并以告後  
之奉祀祠下者

禱雨說

碣石應上苑江西  
同知進士

自湯有七年之旱禱於桑林而禱雨之說始若書之  
禋禮之祭春秋之大雩僅言祀事爾厥後有閉關殺  
犬焚及巫尪之說而禱雨之事爲已悉矣余宦遊廣  
東由瓊南之萬州至秩碣石同知專城以治軍民丁



已之夏不雨余欲漙舊典以爲禱忽有童男數百各折竹枝譁於前請余步行十步一拜至十里外龍潭取水余方閔雨從之而童男數百隨行誼笑若近於戲此與古禱雨之法不同乃倣俗之尤也予因訪海豐之旱而爲禱又係壯丁老幼千百成羣鳴鑼擊鼓譁於署請官出步禱如官緩出則羣起而譁藉之以逞其俗之倣更有甚焉及訪之陸豐則大不然偶遇不雨則靜以待官之禱及官出禱又不敢過而問焉唯謂官禱雨之期卽市米增價之始似共有待澤之意而不欲官之速出而禱也夫以東海涪民不下萬戶固數十倍於碣石相距五十里而風俗之醇如此此碣俗之宜禁而玩狎之風烏可長哉余因思禱於臨時不如禱于平日湯之六事自責其禱久矣爰以碣石濱海無常平積貯人急於食情殊堪憫丁巳冬兩廣制使鄂公巡于潮經由陸豐余卽陳碣石建倉之說分貯常平穀若干石以爲預備報可此殆足以濟民情之急而化倣俗之尤也歟

創建育嬰堂碑記

陸豐  
王之正  
北直  
舉人



甲子夏余以

簡命量移陸豐下車後諮詢民隱邑有溺女之俗不禁愕然異之考周禮大司徒以保息太養萬民一曰慈幼勗長民者收養遺棄哀憐獨重人道也陸邑負山面海饒魚鹽蜃蛤園廬漆林之利民稱小殷富謂宜俗尚敦厚人盡慈祥乃何以呱呱弱質甫肇生機旋就死地枝方長而隨折物起蟄以卽殺誰爲父母殘忍若是原夫薄俗相沿富者吝婚嫁之費貧者苦懷抱之艱用是割愛爲惡棄恩如仇悲歡異情賢愚一轍

陸豐縣志

卷十二

藝文

三

憫此澆風竟成錮習夫天地之大德曰生乾道成男坤道成女二老六子奇偶之義陰陽之道也有乾坤斯有男女造物至仁不聞擇物而生愛長男壽少女也我

朝德政覃敷恩及孤穉訓飭州縣首以孝慈諄切疊布正有守土之責不能收養遺棄爲

朝廷宣揚慈惠舒誠範俗曠職大矣育嬰之設其可緩歟或曰陸邑分治以來政宜興革者何限豈僅闕育嬰一一余忝牧是邦先爲嬰兒計生全者非忽於大



而務於也也敝救其已甚害去其不可待溺女之也  
委骨肉於泥沙擲啼笑于水火傷天地之和干

國家之禁極敝大害如探湯執執斯須不可忍亟爲之  
導迎善氣鼓舞天良俾虺蛇與熊羆同登衽席卽慈  
幼倫全將厚生正德之道於以開其端矣爰集邑中  
紳耆擇地西門外庀材鳩工爲屋一十五間無何不  
日告竣事美觀成諸紳耆請余一言以垂永久余嘉  
其志同樂善有造鄉邦因贅數語而附諸石

新建大安雙橋記

陸豐王之正 北平舉人

陸豐縣志

卷十二

藝文

三

陸之東北曰大安官塘會衆水一自旂頭嶂及風吹  
嶺來曰螺溪水曰膠桐鏡水一由獅子嶂來曰龍塘  
水三派合襟橫截兩岸春夏泛漲浩瀚靡涯擔負徒  
步者苦之靡不作長虹臥波想甲子秋余承乏茲土  
仰體

列憲軫念民依時以修復田間基圍道路橋梁課羣吏  
冬晴農隙方率民及時作防潰計並稽通邑津要若  
者宜梁若者宜渡甫在諮詢區畫間適會上舍 鶴臯

借耆老錢

榮崇

等謁余以官塘甃石爲梁賴鄉舉力



得並建雙橋請題僉助併乞一言以附志乘考官塘  
屬當孔道東達河田北至黃沙內設守備巡檢各署  
上通長樂揭陽等縣車馬必經行旅絡繹且港汊路  
岐非建雙橋以通往來則一切公使經臨商賈輻輳  
其不致嘆褰裳者希矣竊見俗之有力而纖嗇者享  
千陌膏腴日惟錐刀是計或黠者誘以非義則力求  
遂所欲雖揮金巨萬不吝遇義所當爲者顧反靳置  
之不樂爲如雙橋之建謂非明于義之所當爲而爲  
者乎從來造物不全之處貴補以人事而前人未備

者俟後人成之今者雙虹跨水四岸橫梁釋擔負於  
汪洋謝風波於巨浸問行人猶有臨流叱馭蹈險迴  
車者吾知免矣周禮大司徒以鄉三物教萬民而賓  
興之一曰六德一曰六行一曰六藝生人義所當爲  
之事何限豈獨沿道塗修橋梁已哉然徒扛輿梁王  
政所重苟能利濟行人無患病涉是亦義舉俗所難  
也吾因之有感矣陸邑雖濱海而士夫之家頗能好  
義相先無所謂靳纖悉計錐刀者大安古陸地山川  
秀美甲一邑科第輩出如黃忠貞之亮節彪炳史冊



邑人士尤所景仰鄉之民沐其流風餘韻而古處是敦固非一日余因雙橋之建嘉其好義而并有以進之爰捐俸以觀其成而記之如此

瘞金罐小記

陸豐 王之正 北平

陸邑士民酷信堪輿凡棺葬一二年後率啓塚開棺洗骸驗骨以定地之吉凶其慘甚於刑戮或舊塚不利則收之金罐寄頓頽垣荒廟之旁風雨侵凌牛羊踐踏經年累月子孫不一顧視枯骨無依幽魂夜泣風俗敗壞至此爲極良可嘆已余甲子秋兼篆海豐

往來僕見路旁金罐在在而是惻焉傷之爰出示勒限兩月聽民領回擇葬官山逾期不葬卽屬無主當捐俸僱工昇至高阜盡數掩埋示及一月民各觀望猶豫未遵也隨再申前示并飭保甲先將無主金罐具數以報民始知逾限不葬罐係無主隨相率領埋不二十日而金罐歸土殆盡矣昔詹範紹聖間知惠州值兵荒後野多暴骨範取而掩之爲叢塚故蘇長公詩曰江干白骨已衙恩嘉其事也余慚涼德何敢竊擬前人第忝爲民牧風俗之敝必思所以救之



舉也不獨... 亦因是... 絕杏誠之以... 君子

金龍山種樹記

陸豐 王之正 北平 學人

金龍山在邑城東南... 祠龍山書院... 若冠世... 興濟... 藝其間... 時一... 澗高... 瞰... 一... 邑之勝... 歷歷在目... 近則...

陸豐縣志

卷十一

聖

溪諸派合流... 落田疇... 游息之善地... 致詢父老... 編植之值... 春和... 始布土膏... 萌動雨澤... 霖霖既優... 既... 遂欣欣有向榮... 滋長之機... 焉余惟

國家作人造士... 歷今百年... 文教... 誕敷不遺... 嶺徼... 省會... 地既發

帑金建書院... 所在... 郡... 不... 縣... 地名... 詩...



際

列憲心殷造就又復月異歲會拔其尤者優異之  
不暱之秀羣得長養成材以儲棟樑之選猗歟盛矣  
夫樹人之計若樹木然培其本則枝葉茂深以爲  
術則經濟宏義學之設將期諸生以有猷有爲有守  
之學而豈直區區從事制舉業已也然卽舉業論於  
本之立則浸灌義理欲氣之華則寢食經史以博洽  
爲栽培以涵養爲灌溉不疾不徐需以歲月自然發  
爲文章條達宏茂和其聲以鳴

陸豐縣志

卷十二

藝文

三

國家之盛不將在是乎若淺中薄植鹵莽滅裂以希進  
取是直與助長之未人爲難而智出郭橐駝下也奚  
所望於諸生哉諸生行勉之會余蒞陸未及期又以  
調繁順德將去小心奉養有不能已於諸生者爰即  
種樹而爲之說如此他日蒼翠凌霄松作龍鱗而諸  
生之德業文章亦皆著聞當世挺然負楨幹選不致  
鞠困離奇以散材終老也是余之厚望也夫



明朝

詩

甲子門

桂林 訓導 彭舉 邑舉人

憶昔龍舟駕海濤六飛曾此擁旌旄  
雨中謝峽青山暮島外厓門白浪高  
岸草舊埋金箭鏃浪花新逐錦  
征袍可憐成敗皆陳迹故壘殘營翳野蒿

過碣石逢九日

明海 豐令 葉維榮

不為談天來碣石祇緣探海入蓬萊  
三山曉日晴千里萬竈杉雲酒一杯  
白羽已隨蠻瘴盡黃花偏向戰

陸豐縣志

卷十二

藝文

聖

場開風流不減桓司馬醉倚星巖落帽回

過南沙渡值雨

御史 李實 進士 邑人

雲意黯千山春遊興未闌花深紅雨重  
草細綠雲寬舟子頻招渡征人漫倚鞍  
紛紛貪利涉南北幾人還

和吳參戎登元武山寺

指揮 雷大壯

四瀆含靈法介尊功齊神禹奠龍門  
登壇禮斗蒼華護下馬磨崖鼻鼻存  
境豁帆檣經樹抄峰迴石磴巖  
嶽垣將臣仍富見平巖巖翩翩指顧論

陸豐縣志

兵部

卷十二



烈忠... 奕兵...

... 更...

是報國捐軀豈論名岸草... 心風泣遂珠江有...

心鉏於今落木秋霜夜猶叱雲旂北路行

讀張文烈遺稿

同前

厓門宿昔咏零丁此日歛歔血淚聲作者非留去後

恨讀時轉憶箇中情星河搖動龍蛇泣几案淒涼犬

豕鳴白雪青鞵君忍耐招魂取寄伴蘇卿先生讀史有青鞵白

雪若逢我耐得蘇卿十九年之句

本朝

陸豐縣志

卷十二

藝文

四

九日陪總戎曾公登元武山逢晴

盧

恩

舉人知縣

夙抱為霖志常懷捧日心東籬甘露渥北闕景雲深

光霽開天地明良際古今登高憑眺望萬里覲綸音

文昌閣會

同前

松桂繞高閣三台起秀雲江明天地合風動山花羣

謁帝亦叅佛對杯還論文將興福石館為我報諸君

過御史李石州先生墓

同前

芳草萋萋景色幽名賢埋玉壯山邱魂依碧落亭猶

在碑印蒼苔字尚留位列烏臺寒棘木詩傳海國老



松楸文章事業推前輩後學誰為踵石州

殉難臨終作

進士 黃 易

浩氣追千古丹心照太虛君親恩未報慚讀聖賢書

贊黃蒼潭先生忠節

會元 太史 金德嘉

天子重制科取士如置器博求忠孝人昇以民社  
仕則為循良強項羞輒媚一朝遘險艱之死無所避  
海豐黃進士失恃於四歲事父以孝聞友于後母弟  
受經王父前口授通大義十六補諸生廿八舉鄉試  
三十捷禮闈忼慨有大志聽除赴天官遂建海疆議

陸豐縣志

卷十二

藝文

聖

草疏累千言煌然存篋笥歸化汀巖疆捧檄知縣事  
下車省土風所急惟撫字巡行阡陌間蒼頭累糶構  
諸盜絕株連不遺閭左累戶口一以寧四封寢大治  
強藩廝養卒狼貪而虎視算緡踰催科以令為兒戲  
膏血竭編民蠶食百惟意公曰令牧民民命於令寄  
民不堪命矣強禦尚何憐苟能紓民患掛冠夫何志  
抗章以上聞制府稱其義亡何寇亂興北向日漣淚  
髡髮追拘俘脫身於溷廁問關及圭門對賊發三矢

東事等告警靖節矢無貳徒視奔

沈沈



孤忠達九閩旅病幽憤積三山營舍間一棺束枯骨  
太守乃具言臣節真無愧使得睢陽封役民如指臂  
使得卽墨兵桴鼓如大帥不爾司農芴擊賊中賊賊  
不爾侍中血着衣并衣襖千古忠烈人波瀾良不二  
中丞爲拜疏詔從死士類贈葬昭國典碑版具員  
屬剖符爲郎官恩且及冢嗣嗚呼公往矣遺言猶  
可識家人收巾箱其語抑何粹當其陪危時凜凜懼  
矢墜全歸事乃終到此志已遂國人皆曰賢柱下職  
當記

又

吏部  
郎中曾華蓋

甲乙之交遭陽九山飛海豎妖螭吼東南半壁盡陸  
沉隨波逐浪皆濡首黃公忠孝本天生白璧肯受  
緇塵垢潔身義與致身同重趼不惜長奔走闔水虔  
山跋涉勞間關幸脫豺狼口題筆擬追正氣歌幽魂  
還作騎箕偶帝謂孤臣古所難捐軀殉國得未有  
已煥褒綸賁墓門更賜殊榮及身後煌煌國典惟勸  
忠蕩蕩皇恩豈私厚嗚呼當時豈無從逆人而今  
枯骨亦已朽人生百歲祇須臾惟有榮名垂永久如



公一日可千秋感慨長吟醉尊酒

邑城口占

邑貢生 彭士拔 教職

斗城誰道僅彈丸

城池 稍窄

三百里餘地正寬嶺表從今

推保障陸安自昔誌奇觀雲開疊嶂蓮華翠

十景目之一

映洪濤塏影寒試上龍山遙放眼海天無際好鷗鷺

還家

同前

一路逢人說故山鄉音雜還往來關連村臘酒貪是

近遶屋梅花久客還兒女債多聊撫手江邦風美好

關顏重看紫翠浮鷹頂待我應教早閉關

陸豐縣志

卷十二

藝文

七

碣石卽景

碣石 總鎮 韓良卿

碣石如蓬嶼臨風思渺然五臺凌森森萬壑滙淵淵

帆影疾于鳥蜃樓化作烟越裳來使遠還與送朝天

碣石卽景奉和韓鎮臺元韻

碣石 應上苑 江西 進士

碣石滄州遠炎方亦儼然彈冠宜學海觀水必臨淵

魚浴扶桑日雲飛方丈煙南溟連碧落人豈井中天

陸豐道中

惠潮 廣西 舉人

海濱連城堞新豐鷄犬豈非閩綠野虹影錯清波



魚網功於織曹前重似木山巖還問俗尤欲雅

九日登西山峰頂

買生 訓導 程 程 程

西望雙旂山色嘉

兩山相對如旂

忽逢佳節興偏勝勞攀石

磴九迴曲望盡川原百萬家雲接海波羅帶濕風

巖谷角巾斜羞稱桓景茱萸酒得句頻烹顧渚茶

陸豐城邸初春

進七宗人 府主事 余聖言 份

放眼乾坤外幽栖獨任真素餐實我恥飲水是君仁

旭日暄南服淒風起北塵山城呼

萬歲草木亦知春

陸豐縣志

卷十二

藝文

吳

高田埔家居恭紀

萬壽

仝前

空山漠漠曉烟清

北闕晴霞捧日明

天子萬年臨宇宙微臣草野荷

恩榮九天靜落雲璈奏

三殿香闌紫氣盈虎拜颺言逢盛世寸心早已達

神京

移花讀書樓示子姪

仝前



初暖露初勻晨  
初暖露初勻晨  
初暖露初勻晨

禱空階剪出紫雲新詩從草木傳風雅道在寫  
鬼神莫笑迂儒無著述種松人道起龍鱗

八景詩

圖嶺斜暉

兩廣 運使 朱介圭 吳

望遠餘清興夕陽山更佳煙開浮翠岫林淨透  
邊澗鴉爭樹沿坡犢曳柴亦知高臥好鑄石寄幽

洛洲芳草

細草鋪柔綠芳洲媚早春著花如布錦襯席更成

陸豐縣志

卷十二

藝文

吳

雅稱級香飄遙憐拾翠人忘機來白鷺點綴自清

龍山烟樹

樹人兼樹木遺蔭已千章岫桂凝香遠坡松引韻長

蛟龍看欲起雲霧暫教藏寄語今宗匠儲材有棟梁

仙橋夜月

踏月長橋夜空明豁遠眸虹光遙近郭珠彩落前洲

風漾層冰合烟融匹練浮清心同皓魄相與印中

烏墩歸帆

海溼暮烟平收帆之照明牙檣依岫列畫棹區



蛋市爭贏蛤流狀糖社衛城前新月出地丁

沃岫停雲

石室棲雲處氤氳繞翠岑  
羅間茶灶隱松際鶴巢深  
霽葉披僊掌曇花寫梵心  
還將臺閣氣林外契華簪

碣臺觀海

憑高俯巨壑歛滌欲浮空  
烟島朱欄外神山翠靄中  
蕩雲封蜃穴浴日晃鮫宮  
船買帆檣遠波平任好風

甲石吞潮

粼粼潮際石磊砢合支干  
引勝羅青嶼含虛漱碧湍

豐縣志

卷十二

藝文

平

花光吹浪冷星影漾波寒  
不盡臨流興持竿憶釣磻

瀛洲石

舉人沈展才

一洲有一情一石有一趣  
遊歷乎其間揮毫堪作記  
東南大江中粼粼似排砌  
屈指十八端因名為學士  
磐磴通地脉茫茫不可紀  
鮫人多出沒魚龍常鼓吹  
驩客時登臨仙都想如此  
有日侍經筵點頭若欲語

虎山竹枝詞

恩貢章朝廣 碧江生

披雲盡日耕歸來少婦把樽傾  
生薑苦笋山中

新鋤黃手羹



重陽樓 踏紫迴繞樹煙雲掃不開  
手執竹筐踏歌 至家家口為採茶來

試汲清泉煮嫩芽清香隱約細如花  
九龍峰上多靈草不及心山第一茶

楊節

輓詩

陳君友妻

邑廩生

王紹曾

雲之

夫婦人倫始終身一醮時天孤黃鵠侶人泣栢舟詩  
絃斷膠難續心貞石不移捐生完節操萬古景蛾眉